



2015-2016


Intermédiaire

Document étudié n°6

Lecture de documents anciens

décembre 1526. - Abbaye de Molesmes


Être « fonctionnaire » à Molesme



Information faite par nous, Nicolas Javelle/ lieutenant de honorable homme et saige, maistre/ Nicole Begat, licencié en loix, juge en garde de la/ terre et seigneurie de Grancey sur Ource pour révérend/ père en Dieu, monseigneur l'abbé de Molesmes/, seigneur dudit Grancey, appelé avec nous/ honorable homme et saige Me Guy Vignier aussi/ licencié en loix, advocat du roy à Bar sur/ Seine, conseil dudit révérend et

Guillaume de/ Vaulmartin, procureur d'icelluy révérend, sur ce/ que jeudi dernier, ung nommé François François outraigea/ et batit Nicolas Robert, sergent forrestier dudit seigneur et/ Sébastien Taisson, Anne sa femme, Estienne leur filz,/ Quentin Feity, Quentin Richot, Colin Taisson, Jehan/ Taisson et plusieurs autres particuliers dudit lieu,/ jusques au nombre de IIIIXX ou cent se assemblèrent,/ poursuyvèrent ledit Robert et Jehan Henry, greffier/ dudit lieu jusques au cymetière dudit lieu, leur/ feirent et deirent plusieurs excès, oprobres et injures/, les voulurent expulser hors dudit cymetière en commettant/ par ce, monopole et illicite assemblée, ladite information/ faite ainsi que s'ensuit/ et premièrement le samedi XXIX de décembre/ mil VC XXVI audit Grancey./

Estienne de Lantaiges, demorant à Essoye, eagé/ d'environ XX ans, dict et depose par serment etc/ que jeudi dernier environ deux heures après après/ midi, luy estant au lieu de Grancey, vit grand/ amas de gens devant la maison de Sébastien/ Taisson, laboureur, demorant audit lieu, au moyen de quoy/



Archives départementales de la Côte-d'Or
www.archives.cotedor.fr




2015-2016

Lecture de documents anciens

Intermédiaire


Document étudié n°6



se approucha et vit Nicolas Robert dit Pélisson/, sergent de monseigneur de Molesmes audit Grancey/ et garde de ses bois dudit lieu et Essoye, lequel/ tenoit ung homme prisonnier qu'il ne cognoist, sinon/ que l'on dict qu'il est de Semoustier, disant/ qu'il yroit en prison, lequel disoit par la mort dieu/ que qu'il n'y entroit ja et voyant que ledit Nicolas/ pour le vouloir laisser aller, luy bailla ung/ grand coup de poing sur le visaige (° tellement qu'il en/ sortit du sang/ et avoit sa chemise/ désirée) et feist/ en sorte qui se eschappa et s'en courut/ en la maison dudit Sébastien Taisson en laquelle/ il print ung espieu et vint audit Nicolas, luy/ disant par la mort dieu vous en aurez, luy appointant/ ledit

espieu à l'estoumac et eust outragé/ ledit Nicolas s'il n'eust destourné le coup de son espée. Ce voyant, par luy depposant s'approcha/ près et print ledit homme au collet de sa crainte/ qu'il ne outrageast ledit Nicolas, lequel Nicolas/ empogna ledit homme, luy osta son espieu et/ le constitua prisonnier de monseigneur et le mena/ en prison. Et en le menant, oyt plusieurs personnes/ dudit Grancey estans alentour dudit Nicolas/, jusques au nombre de trente ou quarante, tant/ hommes que femmes, les noms desquels/ ne scet, sinon qui congneut ledit Sébastien/ Taisson ; auscuns desquels disoient audit/ Nicolas, et entre aultres ledit Taisson leu/, larron, meschant homme, véroleux, que monseigneur/ ne se servoit que de meschans gens, que l'on/ le devoit assommé et destrappé le pays/

de luy. Lequel Nicolas leur faisoit commander/ de par monseigneur qu'ilz eussent à luy bailler confort/ et ayde à mener en prison ledit homme/, ce qu'ilz ne voulurent faire mais cryoient tous/ auprès icelluy Nicolas, luy disant larron, meschant/ homme et aultres iniures et que l'on le devoit/ assommer. Ce fait, se retira et peu de temps/ après, luy depposant venoit avec/ ledit Nicolas et Jehan Henry en la maison/ Jehan Morelot dudit lieu où illec survint ledit/ Sébastien Taisson qu'il deist audit Nicolas/ qui luy baillast les clefs de la prison pour aller/ parler audit homme qui demandoit confession, lequel/ luy respondit



Archives départementales de la Côte-d'Or
www.archives.cotedor.fr



2015-2016

Lecture de documents anciens


Intermédiaire

Document étudié n°6

qu'il ne s'en souciast et que l'on/ yroit bien sans luy, qu'il ne le serchast plus/ et qui l'avoit assez sercher de trop près/, luy disant ledit Taisson/ qu'il estoit plus homme de bien que luy, qu'il/ estoit meschant homme et que monseigneur ne se servoit/ que de meschans gens, lequel Nicolas luy/ respondit qu'il estoit aussi homme de bien/ que luy, et plus n'en a deposé./ (...)

Symon Morelot demourant audit Grancey aagé d'environ XVIII ans./ a déposé par son serement sur ce fait aux saintz euvangilles de Dieu/ que jeudi dernier passé environ deux heures après midi, il estoit/ audit Grancey au carré de la maison de la confrairie près le/ pillory, oyt bruyt de gens devant la maison Sébastien/ Taisson, laboureur, demourant audit lieu, ou quel bruyt y alla pour/ veoir que c'estoit. Et luy illec estant, vid Nicolas Robert/ dit Pelisson, sergent de monseigneur de Grancey, qui tenoit/ prisonnier ung homme qu'il ne congnoist, lequel disoit audit/ Nicolas que par le sang dieu et la mort dieu qu'il n'yroit point/ en prison et n'estoit pas en luy de luy mener.

Lequel Nicolas/ luy disoit qu'il luy meneroit, ci fust-il plus fort la/ moytié. A l'entour duquel Nicolas et prisonnier estoient/ plusieurs personnes dudit Grancey entre lesquelz estoient/ ledit Sébastien Taisson, Colin Taisson dit le petit Colin, Jehan Taisson/, Benoist Farisien, Jehan Marichault, Mougeot Lory/ et plusieurs aultres jusques au nombre d'environ L ou LX personnes/ tant hommes que femmes. Ausquelz ledit Nicolas fit commandement/ de par mondit seigneur qu'ilz eussent à luy bailler confort et ayde pour aider/ à mener ledit prisonnier es prisons de mondit seigneur. Dont luy/ fut respondu par lesdits Sébastien, Colin, Jehan Taisson et Benoist/ qu'ilz n'y entéroient ja et qu'ilz ayderoient plustost/ à le mener en prison que ledit homme. Et disoit ledit/ Sébastien aux assistants illec estant, allons tous après et/ ne le laissons point emmener en prison, les exhortant/ à grant couraige de ce faire. Toutes foiz, personne ne se/ meut à rescourir ledit prisonnier sinon ledit Sébastien et/ sa femme qui vinrent ayder, tousiours iniuriant ledit Nicolas/ l'appellant larron, meschant homme, ladre, meseau, et que/ monseigneur ne se servoit que de meschans gens et que ledit Nicolas/ estoit ou papier rouge. Nonobstant ces choses, ledit/ Nicolas l'emmena en prison. Et après que ledit Nicola l'eust/ mis es prisons, ledit depposant se trouva ou cymetièrè/ où illec y avoit gros nombre de gens dudit Grancey et/ entre aultres y estoient lesdits Sébastien, Anne sa femme, Estienne/ Taisson leur filz, Quentin Richot, Jehan Taisson, Quentin/



Archives départementales de la Côte-d'Or
www.archives.cotedor.fr






2015-2016

Intermédiaire

Document étudié n°6

Lecture de documents anciens



Fetiz dit Nemo, lesquelz adressèrent leurs parolles audit/ Nicolas furieusement, luy disant larron, meschant homme/, brigand, ladre, monseigneur ne se sert que de meschans gens, larrons et brigands et que ledit/ Nicolas estoit ung assailleur de chemins et qu'il n'oseroit/ saillir hors du cymetière et que s'ilz le tenoient ou hault/ des Crains (?) qu'ilz l'assommeroient, réitérant plusieurs fois lesdites/ parolles et que les serviteurs de mondit seigneur n'estoient que/ larrons et luy auroient larrecyner bien XIII ou XV francs/ et faisoient tous les jours ledit Nicolas beaucoup de prises/ de leursdites bestes, qu'ilz ne souffriroient faire et que si monseigneur/ l'entendoit, ilz ne l'entendoient pas. A quoy faisant, survint/ messire Gilles Thiébault vicaire dudit Grancey, estant sur ung cheval/

et venant de dehors, lequel mist pied à terre devant le/ presbitaire dudit lieu attendant dudit cymetière, vint audit/ cymetière ayant une hachette à sa sainture et se/ adressa audit Nicolas et à Jehan Henry greffier de monseigneur, leur/ disant par la vertu dieu, vous sortirez hors du cymetière/, les appellans meschans gens, excremen, et que par le sang/ dieu, ils sortiroient et qu'ilz n'estoient pas gens pour eulx/ tenir en terre sainte. Lesquels luy respondirent qu'ils/ estoient aussi gens de bien selon leur estat comme luy, ledit/ messire Gilles leur disoit que non, disant aux assistants illec/ estant qu'ils n'estoient pas gens de bien et les eust/ souffrir audit cymetière, disant outre audit Nicolas que par le/ sang dieu qu'il sortiroit et que si ne sortoit, il estoit bien/ en luy de luy bailler d'une hachette qu'il avoit sur sa/ teste. Et lesquelz Sébastien Taisson, Jehan Taisson/ Quentin Fetiz et Quentin Richot disoient audit Nicolas que s'il se tenoit/ gueyres à Grancey, ilz le tueroient quelque part qu'ilz le/ trouveroient. Dit outre sur ce interrogé que ledit messire Gilles/ disoit aux assistants dudit Grancey, illec assistants desdit/ Nicolas et Jehan Henry greffier, hostez, hostez ces meschans/ gens du cymetière et les mener assommer es chams/ comme bestes. Et que qui eust fait ainsi aux gens de/ monseigneur qu'il n'y eust pas tant de povreté ne de rongeryes/ audit Grancey comme il y a. Et plus n'en a deposé.

Meseau : lépreux
Rongerie : pillage

Archives départementales de la Côte-d'Or
www.archives.cotedor.fr